

珠官腔錄卷九

許瑞棠輯著

金

金出大龍墟距城五里昔有人集股於此淘採以辦法不善致虧本常樂石康等處亦皆有之土人掘泥淘取日得銀一二毫<sub>不等</sub>距乾體北一里許有一林相傳亦產金明末禁止淘採故此地名曰禁山

煤

自珠江圍至永安圍一帶之嶺盛產煤土人輒於山坑中拾以供爨清光緒二十三年嘗有公司集資六十萬兩開採石頭埠煤礦以礦苗不佳淺掘即止

鐵

邑中鐵產頗饒公館有鐵山距城東一里土人用舊法採掘資本少獲利微北塞張黃等處自採生鐵鑄釜足供全縣之用其餘各嶺多屬鐵鑛惟未經勘测知之不悉

錫

錫產大廉山而常樂等處所出響錫亦著名

水晶玻璃

進城圍各山嶺中多有水晶附城等處亦產石英為製造玻璃之好原料

石

仙人橋距城東八里有特異礦石未經勘驗不悉何種礦苗



狼人

狼人居合浦縣西北大山中男女俱挽髻前銳後廣以白布覆之續麻為衣經年積垢不一洗滌獵山而食孩童能騎犬引弓射雉逐兔生長粵西沿邊前明成化間應募為狼兵粵東始有此種類善卜雞法取生雄雞折一翼向東去毛肉視雞骨紋路之明暗卜吉凶明則吉暗則凶以定向往性饕餮毛血腥穢啖之立盡不以為嫌有熟狼居瓦屋務耕種常出山市貨與民交易無敢作惡者歸德圖有狼田乃明韓襄毅公征大藤峽調赴合浦防禦山隘即令且耕且守故其後裔猶世承其業雖精悍遜於祖風然果於趨事有足多者

舊志

山子

二

山子無版籍定居散處合浦欽州諸大谷間男女黎黑徒跣砍山種畚視地利盡輔徙去善制虎塗毒藥鏃中射虎立斃婦女短裙及膝坐則兩膝齊跪以為禮夫婦交歡就山僻處挿青於路以斷行人誤觸之遂彎弓相向然足不敢涉城市最畏見官長深林中瞰有戴紅帽者輒避去招之則疾走如飛莫能追躡

舊志

夷人

合浦別有夷人名高粱人不事耕稼以入海捕魚為業初春往往射翡翠於鴉州謂之拾翠

黃志

四民

合浦有四民一曰客戶居城郭解漢音業商賈一曰東人雜



居鄉村解閩語業耕種一曰俚人深居遠村不解漢語惟耕墾爲活一曰蛋戶舟居穴處亦能漢音以採海爲生性儉樸

詞訟簡希

大清一統志

蛋戶其來不可考有謂秦使尉屠睢統五軍監祿殺西甌王越人皆入叢薄中莫肯爲秦意即其遺民以舟楫爲宅捕魚爲業辨水色則知有龍昔時有稱爲龍戶齊民則曰爲蛋家土人不與結婚不許陸居洪武初編戶立里長屬河泊所歲收魚課今北海多此族

按蛋戶近來生齒日繁漸與居民同化間有與土著通婚姻者

獠族

武刀西村有獠族漁而不耕其言語則合浦土話惟重鼻音稱爲獠話廉中土著或即其種歟